

Sura ya 10 - Nguvu ya Kupiga mbio katika Mashindano - Ukombozi

Roho Mtakatifu ni nguvu ya Mungu ya ukombozi katika maisha yetu. “Alipokuwa katika kumwendea, pepo akambwaga chini, akamtia kifafa. Yesu akamkemea pepo mchafu, akamponya mtoto, akamrudishia babaye. Wote wakashangaa, wakiuona ukuu (**nguvu**)wa Mungu.” (Luka 9:42,43a).

Katika Agano Jipya, Roho Mtakatifu anatajwa mara nyingi kuwa ni Kidole cha Mungu. “Lakini, ikiwa mimi natoa pepo kwa kidole cha Mungu, basi ufalme wa Mungu umekwisha kuwajilia” (Luka 11:20). Yesu alisema wazi kwamba alitoa pepo kwa Roho Mtakatifu.

Maadui zetu wa kiroho mara nyingi huwazuia waamini wasipige mbio vizuri na Mungu, kwa kueneza uongo kwamba hawawaathiri Wakristo. Mara nyingi waamini huzongwa na dhambi na mizigo wanayowekewa na pepo. Tunakubali kwamba watu wanaomwamini Yesu hawawezi “kupagawa” na pepo, lakini najua kwamba wanaweza kuonewa na kuathiriwa na pepo. Haina maana kujua pepo anakaa wapi katika maisha ya mwamini. Suala muhimu ni kwamba tunahitaji kuwafahamu pepo hao ili tuweze kuwatoa nje ya maisha yetu, popote pale walipo.

1. Pepo ni nini na Shetani ni nani?

a. **Shetani alikuwa malaika mkuu, Nyota ya alfajiri.** Alikuwa kiongozi wakati wa kumwabudu Mungu. Kulingana na Ezeieli sura ya 28 na maandiko mengine, alikuwa amepakwa mafuta, huenda alikuwa na vyombo vya muziki ndani ya mwili wake. Alikuwa katika bustani ya Edeni pamoja na Adamu na Hawa. Alikuwa na sura nzuri. Ana kipaji kikubwa cha kufanya kazi na biashara. Huenda ndiye aliyeanzisha wazo la kupata utajiri kwa kumiliki watumwa. Ni mwenye majivuno sana, na anatambua uzuri wake mwenyewe. Ana akili sana na pia ni mlaghai. Anafanya mambo kwa mipango.

b. **Nyota ya alfajiri alimwasi Mungu** na kuchukua theluthi moja ya malaika. Akawapanga katika ngazi za kijeshi na kuiga Ufalme wa Mungu (Waefeso 6).

c. **Shetani sasa ni mkuu wa ulimwengu huu** (Yohana 12:31).

d. **Baadhi husema kwamba pepo ni malaika walioanguka**, na wengine husema ni majini labda kutoka katika jamii iliyokuwepo kabla ya Adamu, au labda kutoka kwa mababu zetu. Maandiko hayaenzi hivyo. Lakini, malaika hawakuumbwa ili wakae ndani ya miili ya wanadamu. Inawezekana kwamba pepo ni wale wale waliokuwa malaika na ambao sasa wanatawala na Shetani au pia ni majini yanayoishi ndani ya wanadamu. Sina uhakika juu ya hayo, ninakisia tu. **Hata hivyo, ufafanuzi huo siyo muhimu.** Neno au jina

jingine linalotumika badala ya pepo ni "daimon." Neno hili lina maana ya "kujua," au "ajuaye."

e. **Tabia zao ni chafu kabisa.** Kamusi ya Vines inasema, "pepo ni mawakala wa kiroho wanaojihusisha na kuabudu sanamu. Sanamu yenyewe si kitu, lakini kila sanamu ina pepo anayejihusisha nayo. Pepo huyo ndiye anayewashawishi watu kuiabudu sanamu hiyo na kutoa kafara, 1 Wakorintho 10:20-21; Ufunuo wa Yohana 9:20; Isaya 13:21. Pepo hueneza uongo na kutafuta kuwapotoa watu wanaomwamini Yesu, 1Tomotheo 4:1. Kama roho zidanganyazo huwadanganya watu waamini kwamba kupitia kwa mtu anayewasiliana na mizimu wanaweza kuongea na watu waliofariki. Pepo hutenda kazi chini ya Shetani na wameruhusiwa kutesa kwa magonjwa ya kimwili, Luka 13:16. Kwa kuwa pepo ni wachafu, huwajaribu wanadamu kwa mawazo machafu, Mathayo 10:1. Hutofautiana katika viwango vya uovu, Mathayo 12:45. Watawaendea wafalme wa ulimwengu wote na kuwakusanya kwa vita ya siku ile kuu ya Mungu Mwenyezi, Ufunuo wa Yohana 16:14."

2. Wanafanya nini?

a. Kulingana na Yohana 10:10 huiba na kuchinja (kuua) na kuharibu. Kila kitu wanachokifanya kipo ndani ya mambo hayo matatu.

b. **Kuua.** Mauaji yao yanahusiana na laana ya milele na pia kifo katika maisha haya.

c. **Kuiba.** Ni wezi. Huiba mapenzi ya Mungu kwako. Huiba Neno la Mungu katika moyo wako. Huiba ubikira, afya, amani, na mali.

d. **Kuharibu.** Wanaharibu maisha. Wanaharibu kwa madawa ya kulevya na magonjwa. Wanaharibu familia. Wanaharibu kwa kutumia nguvu, udhalilishaji wa kijinsia na mapigo kama vile UKIMWI.

3. Wanatimizaje malengo yao?

a. **Kwa kukujaribu** (Mathayo 4:1). Lengo lao ni kukutenganisha na Mungu, uishi bila kumtegemea Mungu.

b. **Husema na mawazo au fikira zako** (2 Wakorintho 10:5)

c. **Hutoa ishara na maajabu ya uongo.** (2Wathesalonike 2:9).

d. **Huiba Neno** ili kuwafanya Wakristo wawe vuguvugu wasizae matunda (Marko 4).

e. **Huwadanganya watu kwamba mashetani na pepo hawapo.** Mara nyingi huwatumia watu wanaoonekana kuwa hawana hatia, wazuri, na wakati mwingine hata Wakristo. Nimekutana na watu katika makanisa wanaoonekana kwa wazi kabisa kwamba wana pepo. Watu hao wakaniambia kwamba hakuna pepo wala ulimwengu wa roho. Wanadai kwamba pepo wabaya ni matendo tu yanayofanywa na wanadamu.

f. **Hujaribu kukufanya utende dhambi** ili waweze kukutawala na Yesu asipate nafasi. Mshahara wa dhambi ni mauti. (Warumi 6:23).

g. **Husema uongo na kuwashutumu watu wasio na hatia** (Yohana 8:44 na 2 Wathesalonike 2:9-10). Walimshutumu pia Yesu kwamba ana pepo. "Maana Yohana alikuja, hali wala hanywi, wakasema, Yuna pepo." (Mathayo 11:18). "Nao waandishi walioshuka kutoka Yerusalemu wakasema, ana Beelzebuli, na, kwa mkuu wa pepo huwatoa pepo."(Marko 3:22).

h. **Huchukua mamlaka ya mwathiriwa** na kumpa mkosaji.

i. **Huwawezesha watu kutumia uwezo au nguvu zao** (pepo). Muziki wa roki, ufalaki, kupiga ramli, na kadhalika.

j. **Huwatesa watu** kimwili, kihisia na kiakili

k. **Hutawala na kuendesha** ridhaa ya mtu. Wanadhibiti utashi, mawazo na mhemuko wa mtu, na kutenda kazi zao kwa njia ya mtu huyo. Husababisha mtu huyo aseme uongo na kuamini uongo wao.

l. **Huchukua mamlaka yasiyo na mpaka**, na kukiuka mamlaka ya kweli.

m. **Shetani huigiza kazi nyingi** za Mungu. Yeye sio mbunifu, haumbi kitu chochote, anakili tu na kupotosha yale anayoyafanya Mungu.

Baadhi ya mambo ya kuigiza anayoyatumia Shetani:

Shetani ana uwezo wa kusababisha miujiza kutokea.

Amesababisha baadhi ya Wakristo kuvutiwa na miujiza hiyo. Amewafanya wengine kuogopa sana miujiza hiyo kiasi kwamba wanakosa kazi timilifu ya Roho Mtakatifu.

Kuna maandiko kadhaa yanayoweza kutusaidia kutofautisha

kazi za Roho Mtakatifu na kazi za mashetani na pepo. Maneno ya Mungu katika 1 Wakorintho 14:33 yanazungumzia juu ya roho ya machafuko. Roho Mtakatifu hachezi sarakasi. Yupo ili kumfanya Yesu aonekane wazi katika maisha yetu. Kazi za Roho Mtakatifu kila wakati hupatana na Neno la Mungu. Roho Mtakatifu humwinua Yesu kila wakati na siyo "Yesu mwingine" (2 Wakorintho 11:4). Dini za kishetani haziwezi kukubali kwamba Yesu alizaliwa na bikira, kwamba ni Mungu, kwamba ni Mwana pekee wa Mungu, na kwamba alifufuka katika wafu. Neno la Mungu katika 1 Yohana 4:2-3 linadhihirisha wazi tofauti hiyo.

4. Baadhi ya mifano ya ukombozi na jinsi pepo wanavyotenda kazi.

a. Yesu alimtoa pepo kwa imani ya mwanamke (Marko 7:29).

b. Yule mtu aliyekuwa na pepo mchafu katika nchi ya Wagerasi alikombolewa, na pepo wakaingia katika nguruwe (Marko 5:1-20).

c. Katika Mathayo 9:32-33 mtu bubu alianza kuongea baada ya pepo kutolewa.

d. Katika Mathayo 10:1-8 Yesu aliwapa wanafunzi wake amri ya kutoa pepo

e. Katika Marko 9:17-29 pepo bubu alikuwa ndani ya mvulana tangu utoto wake.

f. Agano la kale linaonyesha pia kwa kivuli jinsi pepo wanavyotenda kazi. Soma Zaburi 10, 56, 59, 64 na nyingine nyingi. Mifano mingine mizuri ni vita wakati wa Agano la Kale, makabila na watu kama Yezebeli na Balaamu. Soma habari hizo huku ukijua kwamba yale yaliyofanywa na maadui wa wana wa Israeli yalifanywa na pepo.

5. Jinsi wanavyopata nafasi katika maisha yako.

a. **Dhambi zako.** Dhambi zote huwapa nafasi pepo, lakini mojawapo ya dhambi zilizo mbaya ni zinaa. Zinaa huwaunganisha pamoja watu wawili kiroho kwa njia ya kipekee.

b. **Dhambi za vizazi.** Pepo huzifuata familia kutoka kizazi hadi kizazi, na wana haki ya kuweka ugonjwa ule ule na laana juu ya familia hizo (sheria ya kurithi). Dini za mashetani zimejengwa juu ya kuabudu mizimu ili kuendeleza laana na kutawala familia. Hujaribu kuwashawishi watu, na hata Wakristo, kwamba ni lazima watoe pesa kwa mganga wa kienyeji ili walindwe. Na baadhi hutoa vitu na mifugo kwa waganga hao wa jadi kwa kusudi la kupata ulinzi na baraka. Watu hawa huamini kwamba kwa kuwasiliana na roho za mababu zao watabarikiwa na kulindwa wasipatwe na mabaya. Lakini ukweli ni kwamba yanayotokea yanakuwa kinyume na matarajio yao. Watu hawa hugeuka kuwa wafungwa wa adui yao, Shetani!

Sikukuu nyingi kama ile siku ya mwisho kabla ya kuanza Kwaresma (Mardi Gras) huko Marekani zimepangwa kuendeleza laana juu ya maeneo kadhaa. Na wakati mwingine hata kukutana kwa familia yote (katika siku maalum) huweza kutumiwa na pepo kuendeleza laana za kifamilia. Ulozi au vuudu (voodoo) na ushirikina yote hayo yana sikukuu zake. Pepo hupata nafasi zaidi katika laana za vizazi na mara nyingi hujaribu kuwateka vijana katika familia. Ndiyo sababu ukorofi na uasi huonekana kwa wazi zaidi watoto wanapofikia umri wa ujana. Wasipofanikiwa kuwateka, hujaribu tena baadaye.

c. **Dhambi katika ulimwengu.** Ulimwengu huu umejaa dhambi na hii huchochea kazi za pepo.

d. **Mizigo, au ukandamizaji** unaoweza kuupata kutoka kwa mtu mwingine. Mbinu ya mara kwa mara wanayoitumia pepo ni kumnyanyasa kijana kijinsia na hivyo kupata nafasi ya kuingia ndani yake maisha yake yote. Mizigo sio dhambi uliyotenda ila ni ukandamizwaji unaofanyiwa kwa dhambi ya mtu mwingine.

e. **Kwa njia ya sanamu katika maisha yako.** Sanamu inaweza kuwa kitu chochote unachokipa umuhimu kuliko Mungu. Inaweza kuwa mtu, tabia, desturi, au hata dhehebu.

f. **Kuasi mamlaka.** Kama mtu hataki kumpokea Yesu kuwa Bwana wake, mtu huyo, atakuwa chini ya utawala wa kiumbe kingine. Hawa alidanganywa na Shetani, na yeye akamdanganya Adamu. Adamu angeweza kutumia mamlaka yake dhidi ya Shetani lakini hakufanya hivyo. Kwa kweli, Hawa alipokea mamlaka yasiyokuwa ya kawaida na Adamu naye hakutumia mamlaka aliyopewa. Dhambi ya asili inaonyesha jinsi dhambi na mamlaka

yalivyounkana pamoja. Ni wazi, kwamba wote wawili wangepaswa kutii mamlaka ya Neno la Mungu (Mti wa Uzima).

g. **Wakristo wanaweza kudhurika** (baadhi ya watu wanapinga jambo hili). Kama mtu ana pepo kabla ya kumpokea Yesu, muda unaweza kupita kabla ya kupokea ukombozi. Baadhi ya watu hawapokei ukombozi kwa sababu hawataki kujiachia kikamilifu mikononi mwa Yesu. Ni kweli kwamba Mkristo hawezi kupagawa na pepo, lakini anaweza kabisa kuathiriwa. Jambo muhimu siyo istilahi gani tutumie: kupagawa, kuathiriwa, au kuonewa? Kitu muhimu ni kujua jinsi ya kushinda kazi za pepo katika maisha yetu.

Maandiko yafuatayo yanaonyesha kwamba bado tunaweza kudhurika hata baada ya kuamini. "Basi Roho ananena waziwazi ya kwamba nyakati za mwisho wengine watajitenga na imani, wakisikiliza roho zidanganyazo, na mafundisho ya mashetani" (1 Tomotheo 4:1). "Mwe na kiasi na kukesha; kwa kuwa mshtaki wenu Ibilisi, kama simba angurumaye, huzunguka-zunguka, akitafuta mtu ammeze" (1 Petro 5:8). "Lakini nachelea; kama yule nyoka alivyomdanganya Hawa kwa hila yake, asije akawaharibu fikira zenu, mkauacha unyofu na usafi kwa Kristo. Maana yeye ajaye akihubiri Yesu mwingine ambaye sisi hatukumhubiri, au mkipokea roho nyingine msiyoipokea, au injili nyingine msiyoikubali, mnatenda vema kuvumiliana naye!" (2 Wakorintho 11:3-4).

Baadhi ya watu husema kwamba damu ya Yesu huwalinda Wakristo. Ndiyo na hapana. Damu ya Yesu hutulinda tunapokuwa tu Wakristo watiifu. "Kama vile Mungu Baba alivyotangulia kuwajua katika kutakaswa na roho, hata mkapata kutii na kunyunyiziwa damu ya Yesu. Neema na amani na ziongezwe kwenu" (1 Petro 1:2). Wakristo wanahitaji ukombozi.

6. Jambo unaloweza kufanya

Shetani alipowashawishi Adamu na Hawa wafanye dhambi, alipata nafasi ya kuwatawala, na kuwatawala wanadamu wote. Ana nguvu kuliko binadamu wa kawaida. Dhambi isiposhughulikiwa, Shetani anakuwa mtawala. Yesu alichukua dhambi zetu pale msalabani akalipa adhabu ya mwisho. Tukiujua ukweli huo na kuwa watii, tutakuwa huru mbali na Shetani na pepo.

Ukombozi haumaanishi kila wakati kukemea kwa nguvu na kuwekewa mikono kichwani, ingawa hilo linawezekana na linatokea mara nyingi. Zipa njia nyingine ambazo kwazo sisi tunaweza kukombolewa.

a. **Uwe mwaminifu.** Ungama dhambi zako. Enenda katika uaminifu na ukweli kwa gharama yoyote. Unaposema uongo unamfanya Shetani awe baba yako.

b. **Kataa** kuwa na uhusiano au mawasiliano yoyote ya kipepo uliyokuwa nayo kama vile: muziki, picha au maandishi yenye kutia ashiki (ponografia), televisheni, sinema, madawa ya kulevya, ushirikina, uaguzi, kupiga ramli, ubashiri, michezo ya kadi (karata) na kadhalika.

c. **Kataa** uhusiano wowote wa kiukoo unaoweza kutumiwa kueneza laana. Tunaweza kuwa na heshima kwa ndugu zetu katika ukoo bila kupokea laana zao.

d. **Kaa karibu na Yesu** kwa njia ya maombi, Neno lake, marafiki wazuri na washirika wa kanisa. Hakikisha moyo wako umejaa mambo ya kiroho. Moyo wako ni uwanja wa mapambano.

e. **Uwe tayari kukombolewa kwa njia yoyote ile anayotaka Mungu.** Uwe na haja ya kuwa huru. Usimuwekee mipaka Mungu. Anazo njia nyingi za kukuweka huru. Kazi yake ni kukuweka huru (Luka 4).

f. **Mara nyingine watu huwekwa huru mbali na pepo** lakini hawajishibishi kwa Neno la Mungu na pia hawaishi maisha matakatifu. Kwa njia hiyo pepo huwarudia tena watu hao na hali zao huwa mbaya sana. Ni vizuri kupata ushauri wa kiroho baada ya kukombolewa. “Pepo mchafu amtokapo mtu, hupitia mahali pasipo maji, akitafuta mahali pa kupumzika; asipoona, husema, nitairudia nyumba yangu niliyotoka. Hata afikapo, akaona imefagiwa na kupambwa, ndipo huenda akachukua pepo wengine saba, walio waovu kuliko yeye mwenyewe, wakaingia na kukaa humo; na mtu yule hali yake ya mwisho huwa mbaya kuliko ya kwanza” (Luka 11:24-26).

Hata hivyo, kuna njia ya salama na ya kiutendaji ya kuwekwa huru. Neno la Yesu liliwatoa pepo katika Mathayo 8:16. Linaweza kufanya vivyo hivyo kwa ajili yako leo. Mimi binafsi nimeshuhudia njia hiyo ikifanya kazi. Kama ukijaza maji kwenye ndoo kabla ya kuyamwaga maji yaliyokuwemo, hakuna hatari ya kuwa na nafasi tupu itakayokaliwa na kitu kingine. Kwa sababu hiyo kama Neno la Mungu likijaa ndani yako, siyo tu kwamba pepo watatoka, bali pia hakutakuwa na nafasi iliyoachwa wazi ya wao kurudi.

“Hata kulipokuwa jioni, wakamletea wengi wenye pepo; akawatoa pepo kwa neno lake, akawaponya wote waliokuwa hawawezi” (Mathayo 8:16). Kujaza Neno ndani yako kutawatoa pepo katika maisha yako.

Ningependa kumualika kila msomaji akubali sasa kutumia njia hii. Hata kama huamini kwamba una tatizo lolote, huwezi kujua kwa uhakika.

Fanya hivi. Dhamiria moyoni mwako kwamba Neno la Mungu lijae kwa wingi ndani yako na kufurika. Na hapo sasa unaweza kulimimina Neno kwa njia yoyote unayopenda. Soma Biblia, sikiliza kanda za Neno la Mungu, kariri Maandiko, yaweke mdomoni mwako, yatafakari mchana na usiku. Litii Neno. Tenda yale ambayo limesema. Neno litatoa nje kila roho katika maisha yako isiyu takatifu.

g. **Ujazwe Roho Mtakatifu** ili uwe na nguvu ya kushinda (Matendo ya Mitume 1:8).

h. **Yesu alitupatia nguvu na mamlaka ya kutoa pepo** (Marko 16:17).

i. **Tunaweza kuwagundua pepo katika maisha yetu tukikaa karibu na Yesu.** Hata hivyo sio kwamba mabaya yote na magonjwa yote yanatokana na pepo, la hashu. Ugonjwa unaweza kusababishwa na matatizo ya kimaumbile

au masuala ya kimaisha. Mwenendo mbaya unaweza kuwa “mwili” wetu. Hata hivyo kama matatizo haya yasipotatuliwa yanaweza kuwa mlango wa kuingilia pepo. Tunapaswa kujihadhari na mwenendo mbaya, tabia tusizoweza kuzishinda, tamaa mbaya, hofu na hisia za kukandamizwa. Usiruhusu hali ya huzuni au mfadhaiko iendeleo bila kupata msaada. Usikubali kutawaliwa na hisia za kujiua, uharibifu au mauaji. Wala usifiche hisia za ubasha na zinaa. Tafuta msaada!

7. Mungu alimharibu Ibilisi

Inamaanisha nini tunaposema Mungu alimharibu Ibilisi? Ni kwa vipi damu ya Yesu inatupatia nguvu?

“Basi, kwa kuwa watoto wameshiriki damu na mwili, yeye naye vivyo hivyo alishiriki yayo hayo, ili kwa njia ya mauti amharibu yeye aliyekuwa na nguvu za mauti, yaani, Ibilisi, awaache huru wale ambao kwamba maisha yao yote kwa hofu ya mauti walikuwa katika hali ya utumwa” (Waebrania 2:14,15).

“Lakini tukiwa tulikufa pamoja na Kristo, twaamini ya kuwa tutaishi pamoja naye; tukijua ya kuwa Kristo akiisha kufufuka katika wafu hafi tena, **wala mauti haimtawali tena**. Maana kwa kule kufa kwake, aliifia dhambi mara moja tu; lakini kwa kule kuishi kwake, amwishia Mungu. Vivyo hivyo ninyi nanyi jihesabuni kuwa wafu kwa dhambi na walio hai kwa Mungu katika Kristo Yesu” (Warumi 6:8-11).

Mistari hiyo inasema kwamba Shetani “aliharibiwa.” Hiyo inamaanisha nini hasa? Inaonekana anazunguka zunguka akifanya kazi ya kuwaharibu wengine.

Kuharibu maana yake ni kufanya nguvu za Shetani ziwe dhaifu - zisifanye kazi. Yesu alifanyaje hivyo? Ibilisi bado anazunguka zunguka akiwaharibu wengine. Yesu alipofufuka alikuwa mzaliwa wa kwanza wa jamii mpya kabisa. Yesu aliweka utu mpya ndani yako siku ulipozaliwa mara ya pili. Utu huu mpya uko juu kabisa kuliko pepo na mashetani. Walikwisha ua jamii ya kwanza ya Adamu, katika Yesu pale msalabani. Shetani na pepo hawana kabisa mamlaka juu ya jamii hii mpya, wanachoweza kufanya tu ni kutuambia uongo. Yesu alipofufuka, pepo hawakuwa na nguvu tena juu yake. Aliweka maisha hayo ndani yako.

Neno kuharibu limeelezwa katika Itifaki ya Strong's kama ifuatavyo:

- 1) kugeuza kitu kisifanye kazi, kikose kazi, kilegee, kisitumike.
- 1a) kumfanya mtu au kitu kisiwe na ufanisi tena.
- 1b) kunyang'anya nguvu, uwezo wa kuathiri na mamlaka

Ufuatao ni mfano wa kuchekesha lakini unaweza kutusaidia kukumbuka na kupata picha inayoelezea maana ya neno “kuharibu”

Hebu jifanye kuwa paka. Sasa mbwa mkubwa anayemuwakilisha Shetani anakunyanyasa, na kukufanya ukimbie kimbie tu na kujificha. Anaiba chakula chako na hata kuharibu mahali ulipojificha. Hatimaye mbwa huyu anakuua.

Kisha kwa ghafla, kwa njia ya muujiza, wewe, paka, unafufuliwa kutoka kwa wafu. Safari hii wewe sio paka tena. Umegeuka kuwa simba! Sasa mbwa yule yule anakuja kwako, anakuangalia halafu anakimbia kwa sababu anajua unaweza kumuua! Mbwa ameharibiwa (amegeuzwa asifanye kazi, amekosa kazi, amelegea, hatumiki, hana ufanisi, amenyang'anywa nguvu, uwezo wa kuathiri na mamlaka)!

Hebu jaribu kuwaza sasa kwamba mbwa yule amepanga mpango fulani. Anakuja kwako na kukushawishi uamini kwamba wewe bado ni paka hujawa simba kweli kweli. Itakuwaje sasa mbwa huyo akifaulu kukufanya uishi na kutenda mambo kama paka? Hivyo ndivyo mbwa Shetani anavyofanya kwa Wakristo wengi.

Jaribu kuwaza tena kwamba Yesu alikuwa “paka” yule aliyekufa. Lakini muda mfupi kabla ya kufa kwake alipata “ujauzito” pamoja na wewe na mimi katika Bustani ya Gethsemane. Alipokufa na kufufuka, akawa mzaliwa wa kwanza katika wafu. Tunapozaliwa mara ya pili, tunakuwa pia simba.

“Naye ndiye kichwa cha mwili, yaani, cha kanisa; naye ni mwanzo, ni mzaliwa wa kwanza katika wafu, ili kwamba awe mtangulizi katika yote” (Wakolosai 1:18).

Tunahitaji kila wakati kusoma Neno na kumtazama Yesu ili tuweze kuitunza kweli hiyo katika mioyo yetu. Tukiacha kufanya hivyo, tutachukuliwa upesi sana na uongo wa dunia hii na kisha tunaweza kudhurika.

8. Kumjua Yesu ndilo jambo muhimu

“Si kila mtu aniambiaye, Bwana, Bwana, atakayeingia katika ufalme wa mbinguni; bali ni yeye afanyaye mapenzi ya Baba yangu aliye mbinguni. Wengi wataniambia siku ile, Bwana, Bwana, hatukufanya unabii kwa jina lako, na kwa jina lako kutoa pepo, na kwa jina lako kufanya miujiza mingi? Ndipo nitawaambia dhahiri, Sikuwajua ninyi kamwe; ondokeni kwangu, ninyi mtendao maovu!” (Mathayo 7:21-23).

Yafuatayo yamenukuliwa kwa kiasi fulani kutoka katika kitabu kiiitwacho “They Shall Expel Demons”(Watatoa Pepo), ukurasa wa 215, kilichoandikwa na Derek Prince.

Maombi kwa ajili ya ukombozi

“Bwana Yesu Kristo, nakiri kwamba wewe ni Bwana wangu.”

1. Tamka kwa dhati imani yako katika Kristo. “Bwana Yesu Kristo, naamini kwamba wewe ni Mwana wa Mungu na njia pekee ya kutufikisha kwa

Mungu – na kwamba ulikufa msalabani kwa ajili ya dhambi zangu na kufufuka tena ili nisamehewe na kupokea uzima wa milele.”

2. Jinyenyekeze. “Nakataa kiburi na kujihesabia haki kidini na heshima yoyote isiyotoka kwako. Sistahili rehema yako ila nashukuru tu kwamba ulikufa badala yangu.”

3. Ungama kila dhambi unayojua kwamba umetenda. “Naungama dhambi zangu mbele zako na sitaki kuficha dhambi yoyote.” (Sasa orodhesha dhambi zote na kuungama).

4. Tubu dhambi zote. “Natubu dhambi zangu zote. Naziacha kabisa na kukugeukia Bwana, unirehemu na kunisamehe.”

5. Wasamehe watu wengine wote. “Kwa uamuzi wangu mwenyewe, nawasamehe bure wote waliowahi kuniumiza na kunikosea. Naweka mbali nami uchungu wote na hasira na kinyongo.”(Sasa orodhesha dhambi zote na kuungama).

6. Vunja uhusiano wako na mambo ya kishirikina na dini zote za uongo. “Nakata mawasiliano yote niliyokuwa nayo na watu wanaojihusisha na ushirikina au na dini za uongo. Nakataa kazi zote za Ibilisi, Shetani na pepo wengine wachafu katika maisha yangu. Naungama na kukataa matendo yangu yote ya kishirikina na dhambi kuwa ni machukizo mbele zako, Mungu mtakatifu na mwenye haki. Nakataa kuathiriwa na laana kutoka kwa mababu zangu.” (Sasa orodhesha dhambi zote na kuungama).

7. Jiandae kuwekwa huru mbali na kila laana katika maisha yako. “Bwana Yesu, nakushukuru kwamba pale msalabani ulifanyika laana, ili nikombolewe kutoka katika kila laana na kurithi baraka za Mungu. Nakataa kila laana kutoka kwa mababu zangu. Na kwa msingi huo nakuomba uniweke huru na kunipatia ukombozi.”

8. Simama na Bwana. “Nasimama na wewe Bwana, kinyume na pepo wote wa Shetani. Najiweka mikononi mwako, Bwana, na ninampinga Ibilisi. Amen!”

9. Toa pepo. “Sasa namkemea kila pepo aliye na utawala juu yangu (wakemea moja kwa moja pepo hao). Nawaamuru mtoke katikati yangu sasa. Katika Jina la Yesu, nawatoa! Naomba kwamba kila nguvu za giza zilizopo katikati yangu, au zilizionionea au kunimiliki, ziharibiwe kabisa na kuondoka kwangu. Najiweka mimi mwenyewe, mwili wangu, moyo wangu, nafsi yangu, hisia zangu, na utu wangu kwa ujumla mikononi mwa Bwana Yesu Kristo awe Bwana na Mwokozi wangu. Naomba haya katika Jina kuu la Yesu, nikiamini kwamba nimekombolewa.”